

Хө киргългән хашнъгар кегдджәнә

Целинн района «Троицкий» совхозин хөд цугъар торгън ноос өгдг тохмта хөд. Совхозин эдл-ахуд хөд өсклгън йир ик чинр зүүджәнә. Эн джил совхозин цуг хөдәс 43 отар киргъгдх зөвтә.

Совхозин 4-ч номертә фермд хөд киргъх нег агрегат, дакад наадк фермсәр 3 агрегат көдлджәнә. Хөд киргългънд ут-турштан 62 машинкәс көдлх бәәсмн. Болв эн машинкәсәс зуг өрәлнә көдлджәнә.

— Хөд киргългън юнъгад им хашнъгар кегдджәхмб?— гидж совхозин гардачнрас сурхла, совхозин директор үр М. М. Жижин болн ах зоотехник үр В. Г. Арнольдов нам бийсн чик хәрү өгч чадцахш. Энүнә учринь меджәх бәәдл уга.

Хөд киргългънә көдлмшин бәәдлнә болхла им. 4-ч номертә фермд хөд киргългънә нег пункт көдлджәнә. Эн пункт деер көдлджәх агрегатд бәәх 24 машинкәс зугл 14 көдлджәнә, наадк 10 машинкәс, киргъачнр уга болсн учрар, зогсджана. Киргъачнрәс икнъкнә эн джил шинкән киргъджәх улс. Омннә көдлджәсн сән дамшлтта киргъачнр талдан көдлмшт көдлджәнә. Зәрм киргъачнр гардачнрасн зөв сурлго көдлмшән хайчкад, герүрн хәрдж одна.

Совхозин ах специалистнр болн партийн организац хө киргългънә кампань эклн бийәрн цуг киргъачнриг талдан көдлмш кеджәх газраснә сулдхад, шишлнә хө киргългънә

көдлмшт тәвх зөвтә бәәсмн. Тиигхлә хөд киргъгдг машинкәс зогсл уга көдлх бәәсмн.

4-ч фермд көдлджәх агрегат 11 минъгън хө киргъх зурата. Болв ода деерән хойрхн отар хөн киргъгдсн бәәнә. Сән дамшлтта гисн киргъачнр үр Е. Ф. Герасименко өдртән 42 хө киргънә, А. Лосева — 42 хө, А. П. Квачева — 35 хө киргъцхәнә. Наадк киргъачнр өдртән 15-20 хөөнәс үлү киргъджәхмн уга. Киргъачнрин өдрин кемджәнә болхла, 25 толгъа хө киргъх зөвтә. Зәрм киргъачнр өдртән 5-6 хө киргънә. Өдрә кемджәгъән эс күцәдг киргъачнр олн бәәнә. Ташр им киргъачнр хөд киргъхләрн арсинь икәр керчнә.

Хө киргългънә көдлмш хашнъгар кегдджәхинь медә, үзә бәәсн бийнә, совхозин директор үр М. М. Жижин, ах зоотехник үр В. Г. Арнольдов учртан авчахмн уга. Иим кампаньд оньган өгл уга бәәдг йовдл ик хаджгър гидж тоолхмн.

КПСС-н Целинн райком болн күч-көлсчнрин районн Совет хө киргългънә кампаньд оньган өгч, киргългънә көдлмшт гарчах эндүсиг дарунь чиклдж, хөөдиг цаглань киргъдж, орн-нутгтан цевр ноос орулдж өгхин төлә ноолдх кергтә.